

俠義歷史
短篇說部

古今武俠奇觀

下冊



大達圖書供應社刊行

新編
分類

古今武俠奇觀卷四

漂陽許慕義編輯

▲兵將武俠類

威震流賊

諸天祐山東東昌人也。少任俠。喜交游。倜儻有大志。游關中。入伍爲兵。數年不歸。崇禎十六年。西安陷。關中望風降附。天祐率壯士十八人。入河州據之。募兵千人。欲襲西安。賊遣萬人攻之。大敗。依山結營。不敢出。久之。天祐率三十騎。閒道出山。後偵賊。望見賊無備。乃留騎山上。令曰。我下襲之。若見賊亂。卽馳下。乃單騎緩轡趨賊壘。賊初不戒。近始呵之。天祐大呼曰。我大膽諸將軍。來取賊首。躍馬繞營走。賊錯愕。爭搏之。營亂。三十騎自山上馳下。呼曰。大軍至矣。賊驚潰。天祐擒斬數十人歸。由是名震關中。十七年。賊長驅渡河向京師。分遣僞權將軍。以精兵十萬取

河州。天祐力不支。亡走山谷閒。三月。賊陷京師。天祐復起兵鳳翔。凡四十二人。鐵虎頭者。嘗從總制洪承疇殺賊立功。後辭去。隱居終南山。天祐遣其將汪鳳容柳含往請之。虎頭慨然曰。諸公以義召我。我何辭。我年幾六十。尙惜死乎。立起謁天祐。當是時。自鳳翔以北。南達漢中。西踰隴。山砦豪傑。莫不暗受天祐約束。賊中亦有期內應者。俟天祐大衆集。同日起。天祐憤不能待。與虎頭等出山號招。猝遇賊步騎數千至。卽前突之。斬其前鋒將。殺數十百人。初。天祐在河州。嘗與賊戰。望見賊中軍大纛。挺戈突入。賊將辟易。橫刺擁纛者下馬。奪其纛馳還。賊將隨後呼曰。諸將軍我知公天威。今奪我纛。何面目見人。幸哀憐還我纛。天祐大笑。擲與之。至是其將適在軍中。目曰。此諸天祐也。賊大驚。益請兵圍之。天祐知事不濟。歎曰。我起兵報國。卒困於此。天也。吾當畢命此賊。馳赴之。賊圍之數重。天祐四面馳突。王某望見曰。事急矣。潰圍入。解甲授天祐。翼之出。遂各脫身走。天祐馬蹶。死於陣。虎頭爲賊獲。大罵不屈死。關中豪傑聞之。皆流涕。

佩刀割臂

羅將軍思舉。四川東鄉人。少時任俠負氣。以事拘禁。嘉慶初。川楚教匪竊發。東鄉縣侯張公奉上官令。招集義勇。張公深悉將軍忠勇有幹才。乃出之於禁。並出將軍所有案卷盈篋。悉舉而焚之。囑令辦義勇勦賊。將軍感涕受命。輒立奇功。十年間。位至總鎮。及各軍凱撤。張公已故。將軍思有所報。不可得。擇日設筵。上供張公位。牲牢酒醴畢具。將軍灑淚祭奠。忽解佩刀。割臂肉一大臠。就火炙熟。匍匐而薦之。血盈襟袖。侍者莫不震驚駭絕。淚汗交流。而將軍從容成禮。若無所苦。初將軍爲偏裨時。率鄉勇百餘人。逐賊於老林。窮追數日。賊竄無蹤。山徑紛歧。時已逼暮。視所裹糧。又盡。相顧躊躇。遙望一峰高插雲漢。攀藤附葛。力竭。纔半途。喜得有茅菴。可免露宿。甫入。一古衣冠叟出迎。鬚眉皓白。狀貌甚偉。羅前致敬。叟曰。山中無盜賊虎狼。將軍可暫宿此。旋出包穀一筐。曰。荒山無菽麥。聊以充飢。命衆分食。須臾立盡。將軍食其一。腹亦竟果。及曉將行。叟謂之曰。將軍不久建節。從此荷三十

年封疆重寄。當爲一代偉人。勉之。因指示曰。由此出山。且得大捷。叩姓字。曰徐庶。將軍時尙未識字。卽菴前插箭誌之。下山遇賊。生擒渠魁。賊平。將軍駐老林要隘。以緝餘匪。覓土人導往舊宿處。則人菴俱杳。建廟祀之。又聞將軍爲大理提督。愛恤士卒。衣食與同。嘗與家將賭跳爲戲。某地有兩崖。對插雲漢。一崖略見人蹟。其一壁立萬仞。無徑可登。一日。將軍令卒荷三百二十斤鐵戟。視人蹟所登。取路直達崖顛。少憩。將軍卽解襪。出鐵尺二。委之地。一手持戟。聳身至對崖。掘坎植戟。仍跳而過。率聚下山焉。後將軍調任別省。出已節縮廉費銀六千。儲藩庫。以備公用。雖古名將。不是過也。

張忠武公逸事一

張國樑本富家子。任俠結客。精拳術技擊。不數年家中落。而技益進。遇歲大飢。餓殍枕藉於途。公睹茲慘狀。心良不忍。盡鬻其餘產。以救災黎。並向鄉之富者謀。勸以解囊助賑。富者不顧。公大怒。乃集諸無賴。謀爲奪富濟貧事。諸無賴皆受公惠。

者。咸唯唯。於是殷富之家。悉遭肱篋。富者知公所使也。亦大怒。以狀聞於官。官飭吏捕之急。公知不可居。乃棄家遁去。從者以百計。偕至廣西叢山中。覓險爲窟。日率從者出剽掠。輒以所得惠貧者。久之黨益衆。資益富。公甘苦與共。部勒有法。黨衆靡不愛而敬之。土豪李某橫行鄉曲。家蓄奴婢甚夥。然待之苛甚。一日以細故撻婢甚酷。竟以傷重致死。婢母冤其女之死。聞於邑宰。宰入李賄。置不問。婢母屢催之。宰怒。拘婢母撻之。鄉人大譁。召婢母謂之曰。官扶強抑弱。是違國紀。循是以往。吾輩將無瞧類。盍訴於太守。一洩此憤。婢母諾之。遂上控。邑宰恐與幕僚謀。造僞供以上。謂婢欲毒主。適以自毒。婢母詐財不遂。捏辭妄訴云云。太守疑之。欲親驗婢屍。邑宰不可。謂棺已一啓。不容再也。太守懦。不能強。集兩造細鞠之。卒不得信讞。正進退維谷之時。忽傳邑宰受刺。太守大驚。遠近密訪。不得蹤跡。越數日。土豪方圍爐飲。姬妾列坐。忽一盜入。數土豪罪。欲殺之。土豪大恐。面灰色。良久氣略鎮。笑謂盜曰。若所言殆指婢事乎。此事吾今已知悔。明日吾將自首。然吾年耄矣。

雅不願死於刀斧之下。擬出百萬資助國家餉。使風燭之年。得保首領以沒。太守當許我也。客湖海傑士。當知大義。豈以一婢故而棄國家百萬之餉乎。盜曰。信然則大佳。吾等拭目視之。脫食言而肥者。終不能逃吾等刑戮也。言已欲去。土豪挽留之曰。願客少住爲佳。吾罹殺人之罪。心常惴惴。今已計定。吾心大慰。故以飲酒爲樂。客既蒞止。應以巨觥賀我。且爲國家賀也。盜不辭。立命傾壺。一飲盡之。時姬妾都散。星河在天。盜拱手而別。土豪送之。方至門外。忽有數十人蜂擁而前。奪盜之刀。執盜之手。縛之細之。幽諸密室。盜猝不及防。俯首就逮。獨居斗室。徒呼負負。翌日。土豪將執送官。指爲婢黨。忽盜衆大至。破土豪之門。入土豪之室。擄土豪之財。以索繫土豪而去。家屬皆驚惶失色。以爲不絕根株。禍且未已。乃又聞於太守。太守將遣騎出偵。忽一人執土豪詣署。指土豪謂太守曰。是魚肉鄉民之李某也。殺婢賂宰。冀逃法網。宰吾殺之矣。今謹以李某送公。公若殺之。則人心大快。不爾則公亦將不免。惟公擇之。太守大驚。噤不能言。良久。乃問之曰。若何人。敢殺宰。其

人曰。吾盜魁張國樑也。太守壯其胆。欲釋之。繼思枉法不可。縱盜亦有罪。立命左右拘土豪與張共寘於獄。時撫廣西者爲勞公崇光。聞其事異之。檄太守逮張至。勞公詢之。大奇其才。且知婢冤。遂罪土豪而薦公於周文忠天爵。文忠愛其才。勸勵備至。公自是改行。一意欲爲國効力。時年才二十也。

張忠武公逸事二

張忠武公國樑。謀勇兼優。戰無不勝。保障蘇浙郡縣。垂七八年。吳越之人。至今尸祝。其後以兵餉大權。爲共事者所掣肘。功敗垂成。卒以身殉。其奇勛偉節。彪炳史冊。無待贅述。若其年少時逸事。有人所未盡知者。茲特采輯一二。以著英雄之氣概焉。公初名嘉祥。廣東高要縣人。美秀而文。恂恂如儒者。然喜任俠。跼弛不羈。年十五之粵西。從其叔父學賈。顧心弗喜也。日與輕俠惡少年遊。其黨有爲土豪所困者。公往助之。殺人犯法。官捕之急。遂投某山盜藪。盜魁奇其貌。以女妻之。女嫌其疏賤。不可。盜魁欲拔爲己副。其黨又不可。山中例呼盜魁爲老大。其支黨皆爲

兄弟稱自二三四五以下各以才能之大小爲次之先後乃呼嘉祥爲老么么者第十也然每出劫必倍獲抗官軍必告捷羣黨皆驚服一日山中糧匱因往劫越南邊境名爲借糧越南人驅象陣來禦盜馬皆奔嘉祥使其黨捕鼠數百明日復戰擲鼠於地縱橫跳踉象見之皆懾伏不敢動遂獲全勝大掠而歸頃之盜魁病死羣黨推嘉祥爲盜魁嘉祥有衆萬人以兵法部勒之與之約曰凡劫官商毋得殺人財貨必留還十之一俾得爲商之貲本官民之旅費旣而官軍討之山中倉猝無兵器嘉祥使人揭一竹竿以禦兵器戰益久則愈削愈銳以刺人無不死且傷者又獲大捷然兵吏爲所執者皆禮而遣之且具書自陳不得已爲盜狀荷蒙赦宥願盡死力及洪秀全反於金田遣黨招之嘉祥拒不往曰吾之爲盜非得已也豈從叛賊者哉向忠武公榮提軍廣西使紳士朱琦爲書招之嘉祥約官軍壓其巢出禦而僞敗乃悉以山中財物散遣其黨使歸爲良而自降於布政使勞崇光軍前改名國樑得旨賞千總銜歸向公差遣由此戰必爲士卒先威名聞天下

蓋公年十八而作盜魁。二十八而折節從軍。爲國虎臣。三十八而致命遂志。平生大小數十百戰。善以寡擊衆。每出己意。坐作進止。率與古兵法暗合云。

黃鶴樓比劍

吳思演。江西之南豐縣人。富而任俠。武藝絕羣。尤精劍術。得異人傳授。一日有雲游道士造門請見。吳知其非凡。卽拜之爲師。道士盡其所長授之。惟不及劍。謂之曰。吾生平絕技。悉授於人。無所隱也。顧能精於其道者。天下惟三人而已。君其一也。吾觀子神骨清澈。頗有道氣。法當尸解。雖工劍術。亦未足爲多。乃更授以吐納導引之術。曰。此內丹也。鍊此。雖金石水火多無所畏。今天下亂離。盜賊蠭起。子當爲國家宣力。十二年之後。見我於無錫惠山之麓。其謹誌之勿忘。吳後游楚中。一日有老翁疎髯道服。貌甚清古。携一少女。造門請比劍術。吳延之入。視其女年僅十四五歲。髮尙垂髻。容豔若桃李。而神清如冰雪。異焉。問姓名不告。曰。第比劍耳。奚瑣屑問爲。相約於黃鶴樓前。訂期而去。及期而往。女已先在。捧劍而立。繡裳寬。

袖非劍裝也。吳請更衣。曰：「不必。」語次，白光一閃，劍已及頂。吳卽出劍敵之。一劍又起，飛舞空際，白光旋繞不定。但聞颯沓之聲，驟如風雨。女身隱躍光中，不能正視。鋒芒駭疾，不離吳之左右上下也。吳愈退，劍愈迫。時觀者千人，咸木立神悚，無敢出一語者。吳大懼，奮身一躍，出八九步外。曰：「神技也，止止，無過偏。」女乃止，視吳微笑曰：「君能敵我，亦大不易。無怪師云爲門牆高足弟子也。」吳異其言，詳詰來蹤，則授女術者，卽吳之師也。常道吳能，故女來一校耳。吳因問女劍術之外，尙有何能。女不答，竟去。楚中大帥聞吳名，招致幕下，令在行伍立功。每殺賊，吳必以身先。百步外取賊目首級，百無一失。賊中稱之爲飛劍將軍。吳有神術，能於槍礮矛戟叢中，奮身獨進，而絕無所傷。偶有一鉛丸墮吳營帳，吳所憑之几粉碎，而吳危坐自若。人皆驚以爲神。後隸張帥麾下，大營兵潰，張帥殉國難。吳隨衆軍退至無錫，駐營城外。方擬出戰，聞賊猝至，衆皆遁去。惟吳獨存，以爲賊距尙遠，必不能來。時吳服五品服，花翎晶頂，據鞍徐行，縱覽惠泉山色。賊之游騎已至，吳若不覺。一賊從

後揮刀斫吳殺之馬下。越數日。吳之親丁來收其尸。納之棺中。載至蘇州鄉間。喚人舁於塚上。舉之覺甚輕。啟而視之。已無所有。惟常日所用一劍而已。人以爲尸解云。此係豫章程君親在營中目擊其事。謂非虛語。程君常與吳周旋。言其絕無異人處。惟夜多不寐。起必以寅初。日向東方噓吸舞蹈。約一時之久。雖盛寒暑不輟也。

樂虛舟

樂虛舟名善。旗人。蘭州參將。咸豐癸丑秋。帥河州兵。從桂總鎮齡自滄州追賊。直抵靜海。賊據獨流鎮。圍之十旬。時勝保最喜甘肅兵。而用之亦勤。樂精敏勇果。每戰必先退。則談笑自若。曰。吾每日出隊。不知能回營否也。既回矣。云胡不樂。或贈之對云。鎮日督兵。思報國。深宵留客。喜談心。以短紙書之。貼幕內。亦軍中雅事也。至臘月。已升副將。勝帥因其敗北。喝摘翎頂。樂立而徐去其頂。勝大怒曰。毫無懼色。亦無營規。以我爲不能殺汝耶。遂一手取令箭。一手取上方劍。衆將跪求。既免。

令速具先奔者之名。樂漫應之。退而遽躍於水。蓋時方在運河舟中也。運河岸窄而舟密。人漂水底。如流雲走月。救者無從下手。久之乃獲。幸不死。勝亦遣醫調之。兼旬而愈。或讓其太激。曰。甘肅之兵。憊矣。今以勢不敵而敗。而令吾具名以殺之。不能強指人。不如自死也。次年二月。戰阜城。殺賊甚衆。爲槍子傷胸。得不死。復歷升提督。咸豐十年。殉難死。

捕盜免罪

溫州周道剛。生有膂力。能運六十斤巨石。旋轉如飛。怒目一呼。筋露髮植。骨節震震作響。而尤以左手爲最捷。與人撲。恒以左勝。與莫增相友善。莫謹厚。韜晦。不以力自詡。望之如書生。周性暴。每毆人。莫輒解之。一日。周又毆人。莫竭誠排解。卒不聽。莫因以手掣其肘而歸。解衣視之。臂間青紫斑斕。指印顯然。莫屢勸其改行。而周不能從。然惟莫之是懼。後莫以滅流寇功。授湖北提督。而周以殺人故。官吏索之急。間關奔鄂。投莫所。莫謂之曰。子不聽吾言。果有今日。吾與子友也。私情也。殺

人者死國法也。吾不能以私情廢國法。然亦不忍子之見執於鄂。立贈以二百金。令速他適。周遂入洛陽。遇異人。授以擊技並劍術。學成。輾轉至魯。先是魯有劇盜大刀王成者。剽悍善戰。爲患閭閻。已非朝夕。浙有餉需五萬金。爲王所劫。浙撫責護解者某尹。至魯緝盜。而以全家質於獄。尹止於逆旅。計無所出。終日徬徨。限期將屆。自縊於旅邸。幸爲居停所窺。解救得免。惟時驚動賓客。咸來訊問。周亦適在其中。聞其故。奮然曰。見死不救。非丈夫也。願効馳驅。遂隻身入盜穴。羣盜與鬥。盡被殺。王奮身相搏。周以劍斷其右臂。生擒而返。解浙歸案。始知周亦爲殺人之犯。浙撫以事實於聞朝。而魯撫亦以地方肅清。歸功於周。請旨賞賚。朝廷嘉其功。赦前罪。而授以武職。旋擒匪亂作。周隨征。戰功卓著。不數年。已官至總戎矣。

黑魚膽

孫金彪字紹襄。未達時。卽以勇俠稱。父曰孫七。精拳技。恃博爲生。有鎗船四五十艘。鎗船者。首銳。掉雙艫。瞬息百里。鵠首置大銃一。中藏四五人。內河寇皆恃此爲

利器。七有德於浙嘉之盛澤鎮。鎮之人無貧富皆善之。七死。金彪年十四。已入武庠。爲諸生。羣鎗船以奉七者奉之爲主。仍設博場於鎮。金彪年雖少。獨能以兵法部勒其衆。刑賞無所私。當是時。蘇城爲粵寇所踞。鎮有富人黃某者。慮賊入鎮掠刼。密款於嘉興某酋。得其檄。民賴以安。於是江浙商販。自上海出入賊中者。輒以盛澤爲樞筦。鎮益殷富。事無大小。皆陰決於黃。有小鬼法大者。鄰鎮巨猾也。聞盛澤繁盛。率鎗船百艘蒞鎮。設博局。輒思大掠以投賊。已定期。黃聞之。大恐。金彪之師沈玉叔謂黃曰。君欲除小鬼法大。非金彪不可。黃大喜。設盛筵款之。金彪曰。敬諾。會有南北巢湖糧艘千人。避亂萃鎮上。金彪說其酋助己。遂與小鬼法大戰。禽而磔之。奪其舟。於是設保衛局。集鎗船團練爲戰守計。事皆一決於金彪矣。初。金彪之滅小鬼法大也。舉盛澤附鎮。使巢酋設博局以爲酬。巢酋謂功高。欲分盛澤博之半。弗得。則怏怏不能平。金彪度巢酋終弗戢也。思并之。會巢酋生日。金彪載羊酒往壽。而陰伏鎗船於蘆叢中以待之。飲博至暮。謂酋曰。今夜月色大佳。吾兩

人駕小舟縱飲湖上可乎。巢酋從之中流酒酣。金彪請酋以銃擊宿鳥。賭勝負。巢酋三擊不中。忿甚。金彪曰。吾一擊便中也。遂洞酋胸。斃湖中。衆大譁。伏舟盡出。金彪手佩刀號於衆曰。若主欲爲盛澤患。故除之。若毋恐。從者聽約束。不從。駕爾舟歸鄉里。衆皆降。蘇賊睨之。莫敢犯。同治元年。李文忠克吳江。金彪率其衆投李磨下。以功授千總。東南大定。生計日絀。張勤果返自河南。挈至陝。以累戰功。擢記名提督。授陝西漢中鎮總兵。賞黃馬褂。光緒壬辰癸巳間。統嵩武軍。駐山東之煙臺。爲東軍冠焉。當金彪之設保衛局也。一日。聞漁父訴曰。孰謂孫氏人守法者。乃取我大黑魚而不與值。夜旣半。金彪忽呼庖人治黑魚膾。庖人求魚不得。方咨嗟。一卒以魚獻。命漁父質之。信。卽斬以徇。自是所部肅然。全鎮以安。

誓掃妖氛

孫將軍。名守法。字繩武。陝西臨潼人也。家酷貧。廢書務農。然多智謀。膂力絕人。性復豪俠。喜交游。嘗飲於市。酣醉兀兀。輒撫膺奮歎曰。不掃妖氛死不休。市人皆大

笑以爲狂。時流寇猖獗。將軍伏劍入行伍。爲制府洪承疇戎旗健卒。每出輒敢當先。以單騎擒賊首點燈子。不沾泥。斬獲甚衆。授守備。又與闖王高迎祥力戰。迎祥棄馬入溝中。將軍亦棄馬逐之。迎祥故壯悍。將軍與之手搏。卒生擒以歸。收其軍。餘賊爲之氣奪。授參將。轉升護潘練營副總兵。威望日隆。所向無前。高傑者。號翻山鷄。雄勇有才略。爲賊羅汝才副將。將軍知其可用。單騎入傑壘。慰降之。傑感將軍恩。爲泣下。以父事焉。歲時必西向拜。誓死報朝廷。後封興平伯。將軍力也。李自成僭號西京。將軍仰天慟哭。棄家保秦世子。以孤軍退守興安之五郎壩。自成招降。將軍數殺來使。豎義旗募兵。約總兵賀真爲恢復計。會清朝定鼎。孟公喬芳督關中。悲其志節。屢以書招將軍。將軍以未得手刃李賊。抱志不出。慷慨悲歌。有妻子可殺。君父之仇不共戴天等語。聞者哀之。尋爲土人所害。始將軍鎮長安時。歸葬其父。偕里中父老浴溫泉。解其衣。徧體創瘢。幾無完膚。人爲將軍泣。將軍意落。落也。爲人嚴重雄威。而和平坦易。性至孝。篤於友誼。每好與儒者游。及臨陣遇敵。